

SESSIONI URDINARIA DI U 4 DI LUDDU DI U 2022

N° 2022 /M3/15

**QUISTIONI URALI DIPUSITATA DA JEAN-PHILIPPE CASALTA, NON ISCRITTU,
A A DESTINAZIONI DI M. GILLES SIMEONI, PRESIDENTI DI U CUNSIGLIU
ESECUTIVU**

Ughjettu : A lingua Corsa è a so pratica cutidiana

*« A lingua Corsa
Vali quant'è l'oru
U ghjornu di a borsa
Ricupartu di misteru*

*Prima, u so soffiu
Vinia da a ghjuventù
Chì, incù un stintu urdinariu
Parlaia Corsu pà u più. »*

Da issa piccula puesia parsunali, vengu à parlavvi di a noscia lingua. Lingua maestra. Lingua da ammaestrà.

Lingua di u pani, lingua di u spiritu, hè di tantu in tantu parlata da i più ghjovani cum'è da i più anziani. Hè parlata, di manera spuradica.

Ma pà avè infurmazioni cuncreti, ci voli à entra in u cori di u sughjettu, a so pratica à u cutidianu. Infatti, tuttu ognunu cunnosci i sforzi di a Cullettività pà fà viva a noscia lingua in i so servizii, cosa primurosa.

A Cullettività parmetti ancu à i stabilimenti pubblici d'insignà a lingua corsa incù un materiali di qualità, in cullaborazioni incù Canopé è ancu dendu suvvenzioni annuali annantu à prughjetti determinati.

Si sà chì a noscia lingua hè in periculu.

Si sà ch'edda hè pocu parlata. Ma hè praticata spessu in i vosci servizii ?

Piddemu un esempiu : una parsona voli parlà corsu pà fà trasportà u so ziteddu da a so casa à u collegghju. Avaria a pussibilità di parlà in lingua noscia ?

Aveti un'idea di u liveddu linguisticu di i vosci agenti (certificazioni B2)?

Un antru puntu intarissanti hè l'insignamentu di a lingua di manera ludica - a parolla hè à a moda – in i stabilimenti.

Sapemu chì deti à i collegghji è licei qualchi suvvenzioni pà u funziunamentu di i filieri bilingui (2000/3000€ è più).

Aveti ritorni d'esperienza di a rializzazioni di prughjetti intarissanti pà i ziteddi incù issi suvvenzioni ?

Qualessi sariani i missi in baddu di prugrammi chì poni muscià a salvezza di a noscia lingua pà via di l'educazioni ?

Vi ringraziu mori.